

[0014]

W Y D R U M

Yn syn 'In emendaesje' yn Us Wurk Nû. 3 skriuwt dr Sipma oar de ein: 'Sa soe it eardere Wydrum 'to Steens' nou ûnderdiel wêze kinne fan Stiens'. Ik soe hjir effen meidiele wolle dat dit yndied sa is. Yn de Procl. Boeken fan Ljouwerteradiel komt de namme Wydrum noch al ris foar, ek noch wol yn de 18e ieu. Der waerd dan wol ris in hûs of hôf forkoft op 'Wydrumer' buiren' of soks sa hwat. Dan waerd soms as neistleger neamd it St. Anthony-gasthûs to Ljouwert. Dit gasthûs hie n.l. in pleats to Stiens en dy pleats waerd by de keap yn 1593 sels neamd 'Wydmeraburen' . Yn 'De archieven van het St. Anthony-gasthuis' fan Mej. R.Visscher fine wy as charter Nû. 1180 'Transportbrief van de zathe en landen Wydmeraburen te Stiens'.

Neffens de opjefte fan it kadaster lei dy pleats bisuden Stiens tusken de Aldlâns dyk en de Stiensers feart, en dy pleats wie yn 1858 (lêste floreen-register) noch eigendom fan it Gasthûs, mar noch al hwat greater as yn 1593. Dy pleats sil dan wol to neiste by it plak fan dy buorren oanjaen, dêr't yndertiid wol in stikmannich huzen byinoar stienen; der binne wol ris twa huzen nêst inoar mei in steech der tusken. Wol is der kâns dat dy huzen hwat mear nei it Westen ta stien hawwe omdat ek al ris fan sa'n hûs sein wurdt: 'de vaart ten Westen'. Undersyk op it sté soe datoangeande hwat mear wissichheit jaen kinne; mar yn it Súdeasten fan Stiens stiet wol fêst.

O. Postma.